

**Masulo i d̄erewel i Pol nakə a  
watsay naha a  
Timote  
aye  
Məfələkwe**

Masulo i d̄erewel nakay Pol a watsay a Timote aye, maraha eye tə maduk i duk i bazlam neheye Pol a tsikay a Timote aye. Pol nenjeyeye ma danjay (2.9), ndo hay haladzay ta mbəday d̄əba (1.15; 4.10-16). A sər ha mazlambar ma mətiye (4.6). A gwaday a Timote ndo məleke ha ma məsler, a wuda na andza wawa, ka dzameye gər d̄ada sa.

Derewel nakay faya ma makweye ahaya a zləm mändze i Pol: Məsler ŋgay, məsənəke ŋgay, d̄əretsətseh ŋgay hay hərwi Labara Ŋgwalak eye. A vəlay gədan a Timote ka məsəmay naha a d̄əretsətseh ma məsler i Kəriste (2.1-13). A gwaday mâ d̄a ha bazlam i Mbəlom ta tsəved̄ eye lele (2.14-15). Hərwi niye, Timote mâ ŋgəday a məkəde wuway, mâ mbəday d̄əba a ndo neheye faya ta giye wu neheye ŋgwalak eye bay aye, mâ pay bəzay na, a mede i Pol. Mâ hənay gər ada mâ ge na, wu nakə Pol ta ndo siye hay tə sənəkətay a ndo hay aye.

Wu neheye mawatsa eye na, ta dzəniye kway ka matətike wu dedək eye (3.16).

*Mətsike me i Pol*

<sup>1</sup> Maa watsa d̄erewel nakay na, nenj Pol, nenj ndo i maslanj i Yesu Kəriste andza nakə a say a Mbəlom

aye. A slər ga ha hərwi ada nâ dā ha bazlam i sifa nakə Mbəlom a gwad ma vələteye a ndo neheye madzapa eye tə Yesu Kəriste aye.

<sup>2</sup> Na watsaka naha a nəkar Timote. Nəkar na, na wudā kar haladzay andza wawa ga. Mbəlom Bəba kway tə Yesu Kəriste Bəy Maduwen kway tâ pa fakaya ŋgama, tâ gaka ŋgwalak ada tâ vəlaka zay.

### *Pol a may naha dərev a Timote*

<sup>3</sup> Neŋ faya na gay naha sisœ a Mbəlom hərwi yak. Neŋ faya na geye məsler tə dərev tsədanŋa eye andza i bəba təte ga neheye tə gaway məsler aye. Ahəl nakə na dūwulaway naha me a Mbəlom aye na, na dūwulaway naha me hərwi yak huya ta həvad kwa ta həpat.

<sup>4</sup> Həlay nakə ka tuwa aye na, kə mətseŋ gər bay.\* A seŋ haladzay mənŋataka hərwi ada dərev ga mâ rah ta mənŋwese.

<sup>5</sup> Na mətša ha gər ta məpe mədzal gər yak nakə ka pa peteh ka Yesu Kəriste aye bay. Təday na, mama yak Lowis nakə a dzala ha ka Yesu Kəriste ada may yak Enise. Ayaw! Na sər ha ta dedək ka dzala ha ka Yesu dərmak.

<sup>6</sup> Hərwi niye, neŋ faya na gwadakeye sa: Kā gay masəfaya a wu nakə Mbəlom a vəlaka gədan məge aye bay. A vəlaka na, ahəl nakə na pa fakaya həlay aye. Vəlay ha dərev yak peteh ka məge.†

<sup>7</sup> Kā dzədzar bay hərwi Məsəfəre Tsədanŋa eye nakə Mbəlom a vəlakway aye na, ma təriye kway ha ndo i zluwer hay bay. Duh ma vəlakweye gədan

---

\* **1:4** Timote a tuwa ahəl nakə Pol a ye faya abəra a gər ha ma Efez aye. Zəba ma 1 Timote 1.3. † **1:6** Zəba ma 1 Timote 4.14; 5.22.

mäge mäsler i Mbəlom ada tə mawudə siye i ndo hay ada tə məgay metsehe a bo kway.

<sup>8</sup> Hərwi niye zluwer mâ gaka mədə ha bazlam i Bəy Maduweŋ kway bay. Neŋ ma daŋgay na, hərwi ŋgay, ane tuk na, kâ ge horoy tə neŋ kame i ndo hay bay. Duh təma məse dəretsətseh hərwi mədə ha Labara Ŋgwalak eye andza neŋ dərma. Ge andza niye ta gədaŋ nakə Mbəlom ma vəlakeye.

<sup>9</sup> Mbəlom na, kə təma kway ha, a zalakway hərwi ada kâ tərakwa ndo ŋgay hay. A zalakway na, hərwi nakə ka gakwa mäsler ŋgwalak eye bay, a təma kway ha hərwi a say məpe faya ŋgama. Andza məgwədə na, kwa ahəl nakə mändzibəra andaya zuk bay aye 6a kə ləva ha bo məvəle kway ŋgama tə həlay Yesu Kəriste.

<sup>10</sup> Anəke na, ka bəz ha ŋgama nakə a vəlakway aye parakka hərwi Yesu Kəriste ndo mətəme ha ndo ki yaw. Neŋgeye na, kə zla na gədaŋ i mədahaŋ, a da ha na, tadə ka təmakwa Labara Ŋgwalak eye na, ka hutakweye sifa nakə ma ndəviye bay ka tor eye.

<sup>11</sup> I ga na, Mbəlom a pa ga ndo i maslaŋ hərwi ada nâ da ha Labara Ŋgwalak eye a ndo hay ada nâ tətikatay.

<sup>12</sup> Hərwi niye nakə neŋ faya na siye dəretsətseh ma daŋgay aye. Ane tuk na, horoy a geŋ bay hərwi na sər Yesu Kəriste. Na dzala ha ka neŋgeye ada na sər ha ta dedek ma sliye faya matsəpe Labara Ŋgwalak eye nakə a vəleŋ aye. Ma tsəpiye na hus a pat bagwar eye nakə ma deyeweje aye.

<sup>13</sup> Tsikatay a siye i ndo hay bazlam dedek eye nakə na tsikaka aye, kwa tsekweŋ kâ mbəday həlay

bay. Ka tsikiye na, dzala ha ka Yesu Kəriste ada wuɖa ndo hay. Ge andza niye ta gədan nakə a yaw mə Yesu Kəriste aye.

<sup>14</sup> Kâ vəlay tsəved a ndəray mâ mbəɖay həlay a labara ŋgwalak eye nakə Mbəlom a vəlaka aye bay, tsəpa na ta gədan i Məsəfəre Tsədanŋa eye nakə mə dərev kway aye.

<sup>15</sup> Nəkar ka sər ha ndo məpe mədzal gər hay ka Yesu neheye ka dala i Azi aye nəteye ta gər ga ha ŋgwedek. Figelas ta Hermogenas nəteye mə walaŋ tay dərmak.‡

<sup>16</sup> Ane tuk na, Onezifor na, a mawen naha dərev, horoy kə gay kame i ndo hay hərwi nakə neŋ ma danɣay aye bay. Bəy Maduwen kway mâ gay ŋgwalak a ndo i gay ŋgay hay.

<sup>17</sup> Ahəl nakə a ndislew kanaŋ a wuzlah gay i Roma aye na, kə pəla təv nakə neŋ mə dəma aye puk puk lele hus a huta ga.

<sup>18</sup> Bəy Maduwen kway Yesu mâ gay ŋgwalak pat nakə ma ta gateye sariya a ndo hay aye. Ka sər ha dərmak ahəl nakə neŋ ma Efez aye na, ka dzəna ga haladzay.

## 2

### *Sidzew i Yesu Kəriste*

<sup>1</sup> Wawa ga, nəkar na, vəlay tsəved a ŋgwalak nakə Yesu Kəriste a vəlaka aye mâ təra kar ha gədan aye.

<sup>2</sup> Ahəl niye ka tətik bazlam i Mbəlom na, abəra ka neŋ. Bazlam nakə na ɖa ha kame i ndo hay haladzay aye na, zla na tətikatay a siye i ndo

---

‡ **1:15** Dala nakə Roma hay tə zalay Azi aye na, neŋgeye bəgom ka dala nakə tə zalay Turki aye.

neheye dedek aye dærmak hærwi ada næteye tâ sla faya matætikatay a ndo siye hay kame sa.

<sup>3</sup> Tadê dæretsætseh kə ndzaka a gær hærwi Yesu Kæriste na, səmay naha andza sidzew nakə lele eye a səmay naha a dæretsætseh aye.

<sup>4</sup> Tadê ndoweye ma diye a vəram, tadê a say neŋgeye mâ yay a gær a bəy ŋgay na, ma kərahiye mæsler i ndo neheye kəriye. I yak na, mâ tæra andza niye dærmak.

<sup>5</sup> Sær ha dærmak na, tadê ndoweye faya ma hwiye mahway i mata ndisle kame na, tadê ka hway ta tsæved eye bay na, ta vəleye wu i merəbe ŋgay bay.

<sup>6</sup> Ndo i mæfæte hay bəbay, mata lehe məhute hohway eye na, ndo nakə a ge mæsler haladzay aye təday.

<sup>7</sup> Dzala ka wu neheye faya na tsikakeye kanan aye, hærwi tadê ka dzala ha faya na, Bəy Maduweŋ ma vəlakeye gədaŋ ka mætsəne wu nakə faya na tsikakeye tebiye.

<sup>8</sup> Yesu Kæriste mâ makaw a gær. Neŋgeye a yaw na, abəra ma gwala i Davit. Kə lətsew abəra ma mədahaŋ. Anaŋ Labara Ŋgwalak eye nakə faya na dātay ha a ndo hay aye.

<sup>9</sup> Neŋ faya na siye dæretsætseh ada tə gəs ga a daŋgay na, hærwi labara nakay ŋgwalak eye. Ayaw, neŋ na, ta peŋ tsalalaw andza ndo mæge zlærwek. Ane tuk na, bazlam i Mbəlom na, ta pay tsalalaw bay. Faya ma diye kame kame huya.

<sup>10</sup> Hærwi niye neŋ faya na səmay naha a dæretsætseh tebiye. Neŋ faya na səmay naha hærwi ndo neheye Mbəlom a pala tay ha aye hærwi ada næteye tâ huta tsæved nakə Yesu Kæriste ma

mbəliye tay ha aye ada tâ ye a bəy ɲgay nakə a le haladzay aye ada tâ ndza mə dəma ka tor eye.

<sup>11</sup> Sa tsa na, kutoŋ kâ səmay naha hərwi bazlam neheye na tsikakeye naha na, bazlam dedek eye hay:

Tadə ka mətakwa tə neŋgeye na,\*

ka ta ndzakweye ma sifa tə neŋgeye dərma.

<sup>12</sup> Tadə ka səmakwa naha a dərətsətseh na,

ka ta tərakweye bagwar i bəy tə neŋgeye.

Ane tuk na, tadə ka gwadəkwa ka sərakwa na bay na,

ma ta gwadiye a sər kway bay dərma.

<sup>13</sup> Tadə ka tərakwa kame ɲgay ndo dedek eye hay bay na,

neŋgeye na, ma ndziye ndo i dedek

hərwi bo ɲgay eye ma sliye faya mənese ha bo ɲgay bay.

*Ndo mæge mæsler i Mbəlom dedek eye*

<sup>14</sup> Matay ha wu neheye na tsik aye a zləm a siye i ndo hay tebiye hərwi ada tâ dzala ha faya. Tsikatay ta gədaŋ kame i Mbəlom, tâ təra a bo ka gər i bazlam hay bay, tâ gər ha hərwi bazlam niye hay na, ta gateye ɲgama kwa tsekweŋ bay. Duh ma nasiye ha dərev i ndo neheye faya ta pay zləm aye.

<sup>15</sup> Nəkar na, ɲgəla ha bo ka məndze andza nakə a say a Mbəlom aye. Təra ndo mæge mæsler nakə a ge horoy ta mæsler ɲgay bay aye, andza mægweđe a dā ha bazlam dedek eye a ndo hay ta tsəved eye.

<sup>16</sup> Bazlam neheye i məkəde wuway kəriye a yay a gər a Mbəlom bay aye na, kâ tsik a dəma bay. Ndo neheye faya ta kədiye wuway andza niye aye na,

\* **2:11** Zəba ma Roma hay 6.5, 8.

faya ta dziye abëra ka tsæved i Mbëlom kame kame dufh.

<sup>17</sup> Bazlam tay faya ma sækahiye andza mbëlak nakë faya ma gonḡobiye. Himene ta Filete nëtëye mæ walaḡ i ndo niye hay.

<sup>18</sup> Ta gær ha tsæved dedek eye, tæ gwad na, 6a Mbëlom kæ lætsa tay ahaya ndo hay abëra ma mædahaḡ. Andza niye ndo siye hay ta gær ha tsæved i Mbëlom hærwi tay.

<sup>19</sup> Ane tuk na, dedek i Mbëlom ma mbëdiye bay. Neḡgeye andza mædok i gay nakë ma ndziye bəḡbəḡ aye. Tæ watsa ka mædok niye, tæ gwad: «Bəy Maduweḡ a sær ndo ḡgay hay.†» Tæ watsa dærmak, tæ gwad: «Kwa way kæ gwad neḡgeye ndo i Bəy Maduweḡ na, mâ ge mænese sa bay.»

<sup>20</sup> Ka sær ha mæ gay i ndo i zlele na, wu maḡgara eye wal wal andaya. Siye hay tæ ḡgar ta gura kægəbay ta bære. Siye hay na, ta tsætsad mayako ada siye hay tæ ḡgar ta dodo i gærwa. Tæ ge ha mæsler tæ wu neheye na, ta tsæved wal wal. Neheye tæ ḡgar ta gura aye kægəbay ta bære aye na, tæ ge ha mæsler pat i magurlom dækdek. Siye hay tæ ge ha mæsler kwa waray waray pat pat.

<sup>21</sup> A tsik nakay na, ka nækway. Tadə ndoweye kæ gær ha mæge mænese tebiye na, Mbëlom ma vëleye mæsler ḡgay wal ma tæriye andza wu nakë tæ ḡgar ta gura kægəbay ta bære aye. Ndo i gay ḡgay ma piye na wal hærwi a sær mæge mæsler i ndo i gay ḡgay tebiye.

<sup>22</sup> Bor i wu neheye lele bay a satay a gawla hay mæge aye na, kâ ge bay, hway wu yak abëra mæ wu niye hay. Ge wu nakë ḡgwalak eye tæ dærev yak peteh, pa mædzal gær yak bəḡbəḡ ka Yesu, wuda ndo

† 2:19 Zəba ma Məpesle 16.5.

hay, ndza tə zay ta ndo neheye dārev tay tsədaŋŋa eye ada faya ta duwulay naha me a Bəy Maduweŋ aye.

<sup>23</sup> Tadə ndo hay faya ta kədiye wuway ka wu nakə ma giye ŋgama bay ada ka wu i matərakahaŋ na, kâ tsik a dəma təbey hərwi ka sər məkədə wuway niye hay ma ndəviye na, tə matəre.

<sup>24</sup> Ane tuk na, ndo nakə faya ma giye məsler i Bəy Maduweŋ aye na, kutoŋ mâ təra ta ndo hay bay. Mâ gatay ŋgwalak a ndo hay tebiye, mâ sla faya matətike a ndo hay lele, mâ səmay naha a wu nakə ndo hay ta tsikiye faya aye.

<sup>25</sup> Tadə agəna ndo mənə dāre yak hay ta təma wu nakə ŋgwalak eye bay na, dātay ha ta ləfedede eye. Agəna Mbəlom ma vələteye tsəved ka məgəre ha mezeleme tay hərwi ada tâ sər bazlam dedək eye.

<sup>26</sup> Kwa tadə Fakalaw kə gəs tay andza a mbəzl tay ha a balay hərwi ada tâ ge wu nakə a say aye bəbay na, agəna ta maweye ka mədzal gər ŋgwalak eye hərwi mətəmaw abəra mə həlay ŋgay.

### 3

*Ndo hay ta gəriye ha Mbəlom ka mandəve i məndzibəra*

<sup>1</sup> Sər ha wu nakə faya na tsikakeye kanaŋ aye: Ka maduk i duk i məhəne hay na, dəretsətseh ma giye andaya haladzay.

<sup>2</sup> A həlay niye ndo hay ta wudiye bo tay eye dəkdək, ta wudiye suloy, ta giye zlapay, ta dəslay ha gər a bo tay, ta tsadiye Mbəlom, ta tsənateye zləm a bəba tay hay bay, ta gateye sisœ a ndo neheye faya ta dzəniye tay ha aye bay, ta rəhay ha gər a wu i Mbəlom hay bay,



<sup>3</sup> ta wuḍiye siye i ndo neheye mə gay tay aye bay, ta sakatay naha a ndo hay bay, ta tsikiye wu nakə lele bay aye ka ndo hay, ta səriye i tay na, məgay dəretsətseh a ndo hay, ta wuḍiye wu lele eye bay,

<sup>4</sup> ta giye daf ka ndo siye hay, ta giye wu hay ze mədzele faya, ta dəslay ha gər a bo tay haladzay, ta wuḍiye na, wu nakə a yatay a gər a bo tay aye a ze Mbəlom.

<sup>5</sup> Ta ndzəkitiye bo ndo i Mbəlom hay ane tuk na, ta təmiye gədaŋ i Mbəlom hərwi ada tâ huta mede ŋwalak eye na, ta wuḍiye bay. Nəkar na, kâ ndza ka təv tay bay.

<sup>6</sup> Siye hay mə walaŋ tay anəke faya ta fələkwiye a gay i ndo hay. Faya ta fələkwiye ta tsəfetsəfe eye, ta vateye gər a ŋgwas neheye bəle eye hay aye hərwi ada tâ təma bazlam tay. Ŋgwas neheye ta ge mezeleme haladzay, faya ta pay bəzay a wu neheye wal wal a yatay a gər aye.

<sup>7</sup> Ta wuḍa matətike wu hay ane tuk na, tə sər mətsəne wu nakə dedək eye bay.

<sup>8</sup> Ndo neheye na, faya ta kərahiye bazlam dedək eye andza Zanes ta Zambəres ahəl niye ta kərah bazlam i Musa\* aye. Mədzal gər tay kə nas, tə dzala ka Mbəlom ta dedək bay.

<sup>9</sup> Ane tuk na, ta diye kame sa bay hərwi məge wu i matərakahaŋ tay niye hay ma zəbiye mə dzaydzay kame i ndo hay haladzay parakka andza i Zanes ta Zambəres nakə ahəl niye ndo hay tə sər ka matərakahaŋ tay nakə tə gawa aye.

---

\* **3:8** Zanes ta Zambəres: Mə kule i Yahuda hay tə zalawatay a maharam i Ezipt hay andza niye. Zəba mə Madayaw abəra ma Ezipt 7.11, 22.

*Ndza bəŋbəŋ mə wu nakə ka tətik aye*

<sup>10</sup> Nəkar na, ka sər wu nakə na tətikawatay a ndo hay aye lele, mede ga kəkay na, ka ŋgatay, ka sər wu nakə a seŋ məge ma məsler ga aye, ada ma kəkay na pa mədzal gər ga ka Mbəlom aye ka sər ha. Ka sər dərmak kəkay nakə faya na zliye ŋgatay ada ma kəkay na wuda ndo hay aye, ada ma kəkay neŋ mandza eye bəŋbəŋ aye, ka sər.

<sup>11</sup> Ka sər kəkay nakə ndo hay tə geŋ dəretsətseh ada ma kəkay na sa dəretsətseh ma wuzlahgəma i Aŋtiyos, ma wuzlahgəma i Ikoniyom ada ma wuzlahgəma i Listəre aye. Ayaw! Ndo hay ta seŋ dəretsətseh haladzay, ane tuk na, Bəy Maduweŋ kway kə təma ga ha abəra mə wu neheye tebiye.

<sup>12</sup> Ta dedek ndo neheye tebiye a satay mədzepe tə Yesu Kəriste ada məndze andza nakə a say a Mbəlom aye na, ndo hay ta sateye dəretsətseh.

<sup>13</sup> Ndo i sewed hay ta ndo neheye faya ta vatay gər a ndo hay aye məndze tay ma nasiye kame kame, ta vay gər a bo tay ada ta vatay gər a siye i ndo hay dərmak.

<sup>14</sup> Nəkar na, ndza bəŋbəŋ mə wu nakə ka tətik aye ada nakə ka təma tə dərev yak peteh aye. Ndza bəŋbəŋ lele hərwi matətikaka way na, ka sər.

<sup>15</sup> Sər ha na, ka sər Derewel i Mbəlom kwa ahəl nakə nəkar wawa eye mba aye. Derewel i Mbəlom niye na, ma vəlakeye tsəved ka məhute metsehe hərwi ada tadə ka dzala ha ka Yesu Kəriste na, Mbəlom ma mbəliye kar ha.

<sup>16</sup> Wu nakə tebiye tə watsa a Derewel i Mbəlom aye na, a yaw mə bazlam i Mbəlom. Derewel nakay ma dzəniye kway ka matətike wu nakə dedek aye, tadə faya ka gakweye mənese na, ma dəkweye ha,

ma kətiye kway, ma tətikakweye hərwi ada kâ gakwa wu lele eye.

<sup>17</sup> Məsəfəre i Mbəlom a ge andza niye na, hərwi ada ndo i Mbəlom mâ təra neŋgeye maləva bo eye hərwi ka təma a dərev ŋgay wu nakə tebiye a say mede mata ge ha məsler ŋgwalak eye aye.

## 4

### *Mədə ha bazlam i Mbəlom*

<sup>1</sup> Neŋ faya na tsətsahiye fakaya, da ha Labara Ŋgwalak eye. Na tsətsah fakaya kame i Mbəlom tə Yesu Kəriste. Neŋgeye ma gateye sariya a ndo neheye ta mət aye ada a ndo neheye nəteye tə dərə aye tebiye. Na tsətsah fakaya andza niye na, hərwi ma maweye ada ma təriye bəy.

<sup>2</sup> Da ha bazlam i Mbəlom, rəzlay a gər huya kwa a həlay lele eye ada kwa a həlay nakə lele bay aye. Tadə ndo hay faya ta giye mənese na, tsikatay faya, tsikatay t̄a gər ha mənese, matay naha dərev, tətikatay ta ləfedədə eye,

<sup>3</sup> hərwi həlay eye ma ndisleweye ndo hay ta pay zləm a ndo neheye ta tətikateye wu neheye dedək eye bay aye. Duh ta wudīye na, mäge wu neheye lele bay aye ada andza niye ta pəliye ndo matətike hay haladzay ada ta tsikateye wu nakə a yatay a gər a zləm tay mətəne aye.

<sup>4</sup> Ta peye zləm a wu nakə dedək eye sa bay, ta peye zləm duh na, a ndo i maraw me hay.

<sup>5</sup> Ane tuk na, nəkar na, gay metsehe a bo yak huya, səmay naha a dərətsətseh, datay ha Labara Ŋgwalak eye a ndo hay, ge məsler nakə Mbəlom a vəlaka a həlay aye tebiye.

<sup>6</sup> Neŋ na, na tæra andza wu kəriye nakə ta vəleye a Mbəlom aye. Həlay nakə ta kədiye ga, na gəriye ha mändzibəra aye mazlambar kə ndislew.

<sup>7</sup> Na gay məsler a Yesu Kəriste tə dərev ga peteh andza ndo nakə a ŋgəla ha bo ka mabəbazl bo seh lele aye. Na ndəv ha wu nakə Mbəlom a vəleŋ a gwedeŋ ge aye andza ndo nakə a ndəv ha mahway aye. Wu neheye ka dzalakwa ha faya na, na gər ha kwa tsekweŋ bay tebiye.

<sup>8</sup> Anəke na, Mbəlom kə ləva ha bo ta magogoy ga mə mbəlom hərwi neŋ kame ŋgay mənese kwa tsekweŋ andaya fagaya bay. Bəy Maduweŋ kway, neŋgeye nakə ma gateye sariya dedek eye a ndo hay ma ta vəleŋeye magogoy ga pat nakə ma ta gakeye sariya aye. Ma ta vəleŋeye a neŋ dekdek bay, ma ta vəlateye a ndo neheye tebiye faya ta həbiye na aye.

*A say a Pol Timote mâ ye ka təv ŋgay*

<sup>9</sup> Ge gədaŋ hərwi ada kâ yaw ka təv ga bəse,

<sup>10</sup> hərwi Demas kə gər ga ha. A wuda wu neheye ka mändzibəra aye, hərwi niye ki ye ŋgway a Tesalonik. Kəreskenes neŋgeye na, ki ye a Galat ada Titus na, ki ye a Dalmatiya.

<sup>11</sup> Maa zəkaw ka təv ga na, Luka mahəŋgeye. Aza ka deyeweye na, dumara ta Markus salamay hərwi ma sliye faya madzəne ga ka məsler.

<sup>12</sup> Tisik i ŋgay na, na slər ha a gəma i Efez.

<sup>13</sup> Ahəl nakə ka deyeweye na, do a gəma i Tərowas, zleŋ ahaya peteked i mətasl ga nakə na gəray ha a həlay i Karpus aye. Həl ahaya dərewel hay dərma, ane tuk na, a seŋ wene wene eye na, neheye tə ge ta mbal aye.

14 Aləgəzandər ndo məvədə wu kə geŋ sewed haladzay. Bəy Maduweŋ kway ma ta may ha a dəma magogoy i məsler ŋgay.

15 Nəkar na, ge metsehe bəna agəna ma pəliye fakaya tsəved məgaka sewed dərmak hərwi kwa tsekwen a wuda bazlam kway bay.

16 Pat makurre eye nakə ti ye ga ha kame i sariya, na ge me abəra ka bo na, ndəray ki ye naha mata meŋ bo bay, tə gər ga ha. Mbəlom mâ pəsatay ha.

17 Ane tuk na, Bəy Maduweŋ kway, neŋgeye na, kə gər ga ha bay, kə vələŋ gədan hərwi ada nâ da ha bazlam ŋgay parakka, nâ həmbər faya abəra kwa tsekwen bay. Ada ndo i gəma hay wal wal haladzay ta tsəne. Bəy Maduweŋ kə təma ga ahaya abəra mə bazlam i zil.\*

18 Ada na sər na, Bəy Maduweŋ ma ta təmiye ga ha abəra mə wu neheye tebiye lele bay aye, ada ma tsəpiye ga hərwi ada nâ ye a bəy ŋgay a mbəlom. Zambadəkway ka tor eye. Mâ ge bo andza niye!

### *Mətsike me*

19 Tsikatay ha me a Pərisil ta Akelas. Tsikay ha me a ŋgwas i Onezifor ta wawa ŋgay hay.

20 Erast, neŋgeye na, ma ndziye ma gəma i Korinje. Tərofime na, na gər ha ma gəma i Melet hərwi neŋgeye dəvats eye.

21 Ge gədan madayaw ka təv ga kanan ta bəse, ahəl nakə həlay i mətasl ka dazlay zuk bay aye. Ebulus, Pudenes, Kolodiya, Linus ada tə siye i ndo məpe mədzal gər hay ka Yesu neheye kanan aye ta tsikaka naha me.

---

\* 4:17 Zəba ma Dəmes hay 22.22.

<sup>22</sup> Bəy Maduweŋ mâ tsəpa kar huya. Mâ pa fakuma ŋgama tebiye!

## **Dzam Wedeye New Testament in Merey**

copyright © 2012 Wycliffe Bible Translators, Inc.

Language: Merey

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Merey

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 18 Apr 2025 from source files  
dated 29 Jan 2022

024cb559-a7ea-5bd1-9dc9-f33abc74bfec